

CESTRIA.



CESTRIA, Deua, Antonino, vrbs Angliæ, Comitatus Cestrensis super Deam fluuium, Romanorum monumentis celeberrima, de qua Iohannes Lelandus comment. in Cygneam cantionem, ita scribit. Deua, Britan, Cair Leon ar dour Devv. id est, Castrum Legionis super Deuam flu. Ar Devv. à Britannis consulte additum, vt flu. titulo distinguerent à Cair Leon ar vviske, quam urbem Romani Iscam appellabant, & Iscelegiam. Antoninus scriptor Latinus hanc urbem Deuam à flu. appellat. Beda secundo capite, secundi libr. historiæ Anglicanæ, urbem Cairlegion appellat, secutus Britannos. At Saxones, aliud indidère nomen, videlicet Legecester, à Legionum castro, vt apparet ex Rogeri Houedeni historia. Admiror interim, quæ auctoritas eò deduxerit Gulielmum à Maildulphi curia, vt libro de Episcopis Angliæ quarto, scriberet, Legionum urbem inde dictam, quod emeriti milites Iulianarum Legionum, illic confederint. Ego verò palam pronuncio, nec legiones Iulij, nec ipsum Iulium eo peruenisse. De Decia flu. fusius hic scriberem, nisi nuper in libello, cui titulus Genethliacon, in gratiam Eadueardi Principis edito, accuratè pinxissem Tegeum lacum, Penliniæ ornamentum magnum à quo defluit, ac præterea cursum illius omnem ad ipsa vsq; ostia. De antiquitate & magnificentia huius vrbs scribere quidem multi, at fusissimè Rainulphus Hygedenus, & Henricus Bradeshauus, monachi Cestrenses: Ille, in historia, cui titulus Polychronion: hic in vita D. V. Verburgæ virginis. Sentit magnam hæc ciuitas cladem, tyrannide Ethelfredi Nortabrinorum Regis, at maiore longè persequutione Danica, qua tantum non funditus concidit. Ethelfreda filia Ealfridi Magni, & Coniunx Ethelfredi Comitis Merciorum, quam Henricus Huntendunensis, eleganti carmine vel ad sydera tollit, urbem & reparauit, & exauxit. Leofricus Merciorum Comes, vir, tum nobilissimus, tum optimus, Deuæ gloriam insigniter promouebat. Idem fecit & Lupus Comes, gente Nortmannus. Tandem Petrus quidam, coronidem magnificentiæ addidit, eò transferens Lichefelda sedem Episcopatus, Gulielmo Magno Anglis imperante. Atque hæc quidem ex Lelandi commentarijs hætenus. Rainulphus autem Cestrensis monachus, quem Lelandus allegat, Polychronij sui lib. 1. cap. 18. Ciuitas, scribit, Legionis, videlicet Cestrensis, situatur in Marcheis Angliæ, super riuium Dea, & Latine nuncupatur Cestria, vel Legicestria, & ciuitas Legionis etiam, eò, quod ibidem hyemabat militum auratorum legio vna, quam Iulius Cæsar miserat Hiberniam superandam. Et postea Claudius Cæsar, abinde Legiones misit ad Orcades insulas expugnandas. Huius ciuitatis ædificatoris nomen non constat. Nam quicumque viderint concaua ædificia ibidem magnis lapidibus constructa, opera Gigantum, vel Romanorum potius, quam Britannorum esse iudicarent. Antiqua ibidem hominum nomina caracteribus veteratis inscribuntur. Iulij quoq; Cæsaris nomen ibidem mirabiliter insculptum est. Hæc quoque ciuitas, tempore Britannorum prima erat Venedotia, videlicet Borealis Valliæ partis. Ista quoque ciuitas magnum numerum mercimoniorum tam recipit, quàm emittit: pecoribus, frumentis, & piscibus, præcipuè salmonibus, abundat. Huc vsque Polychronion. Cestria igitur Episcopalis, magnifica, & celeberrima Angliæ vrbs, amplitudine, superbo ædificiorum nitore, & cultissimorum hortorum elegantia commendata, duo passuum millia, in circuitu colligit. Ecclesias parochiales nouem, & cathedralem elegantem exhibet, præter loca alia sacra, vt hospitalia, & Nosocomia, religioni nuncupata. Suburbia habet elegantissima, & spaciofa, plateas patentes, & domus eum in modum constructas, vt per vniuersam propemodum urbem ambulare quis possit, & in plateis tamen nunquam conspiciatur, sed in peristilijs, & mœnianis, ab vtrâque platearum parte constructis, quas vulgò (le Roes) nuncupant. Quæ quidem ambulacra, plurimas vtrinque officinas, & multos, varijs in locis, gradus habent.

Hæc quæ sequuntur, Londino cum vrbs Cestrensis icone, operinostro inferenda, accepimus.

Anno ante Christi incarnationem 917. Rex Leyll incepit ædificare ciuitatem de Cairlehon, quam hodie Cestriam nuncupamus, ex incepto opere Lehon Gauer, magni Gigantis, qui circundedit ciuitatem muro, & hodie Britannica lingua, Cairlehon dicitur.

Anno salutis 126. Marius Rex Britannia, hanc ciuitatem ædificijs subleuabat, qui ibidem inhumatus manet.

Anno 901. Elfleda, Ducissa Marchiæ, hanc urbem ædificijs restaurauit, post ruinam per Danas factam, & muros magis spaciosos erexit, adeò, quod Castellum muro inclusit, quod prius extra urbem erat positum.

Anno Domini 959. Rex Edgar, Cestriæ, aulam suam fouit, Riuium Dea introibat lintre, vbi octo Reges, remis in eo laborare coegit, ad Ecclesiam S. Ioannis appulit, & inde ad suum Palatium reuertebatur, vt appareret eum fuisse dominum & Regem tantarum Prouinciarum. Nomina autem regum hæc sunt.

Rynoch, Rex Scotorum. Malcolin, Rex Cambriæ, Macon. Rex Monæ insulæ. Dufal, Rex Australis Valliæ. Syfrith & Hovvel, Reges Borealis Valliæ. Iacobus, Rex Gallovay, & Lukil, Rex Vvestmerlandiæ.

Anno reparatæ salutis 1078. Rex Vvillhelmus Conquestator, Lichefeldia Episcopatu, in Cestrensem commutauit.

Anno Domini 1301. Rex Eduardus primus, filium suum maiorem natu, nomine Eduardum, in Principem Valliæ creauit, eidemq; Principatui, Cornubiæ, & Cestriæ Comitatum adiecit.

Anno Domini 1335. Rex Eduardus tertius, Cornubiæ Comitatum, in Ducatum erexit, eumque filio suo natu maximo Eduardo dedit, vnâ cum Comitatu Cestrensi.

Ioannes cognomento Scorus, filius Comitis Angutiæ, vltimus fuit Cestriæ Comes, à cuius tempore Comitatus ille, vnâ cum Ducatu Cornubiæ, ad Primogenitum Regis Angliæ spectat.